

摘藻堂四庫全書薈要

子部

欽定四庫全書薈要卷一萬六百十五

子部

御定佩文齋廣羣芳譜卷五十二

花譜

雞冠

增花史雞冠花俗名波羅奢花 碧雞漫志吳蜀雞冠

有一種小者高不過五六寸目曰後庭花 原有掃帚

雞冠有扇面雞冠有纓絡雞冠有深紫淺紅純白淡黃  
四色又有一朶而紫黃各半名鴛鴦雞冠又有紫白粉

紅三色一朶者又有一種五色者最矮名壽星雞冠扇面者以矮為佳帚樣者以高為趣今處處有之三月生苗入夏高者五六尺矮者纔數寸其葉青柔頗似白莧菜而窄觔有赤脉紅者莖赤黃者白者莖青白或圓或扁有筋起六七月莖端開花穗圓長而尖者如青箱之穗扁卷而平者如雄雞之冠花大有圍一二尺者層層疊卷可愛穗有小筒子在其中黑細光滑與莧實無異花最耐久霜後始薦苗花子氣味俱同甘寒無毒主治

瘡痔及血病止腸風瀉血赤白痢崩中帶下分赤白用  
子入藥須炒

彙考原楓窓小牘雞冠花汴京謂之洗手花中元節前  
兒童唱賣以供祖先 增花經雞冠八品二命 花木

考蘇黃門詠雞冠花詩後庭花草盛憐汝繫興亡世遂  
以雞冠為玉樹後庭花不知世說諸書有薰葭倚玉樹  
語杜少陵飲中八仙歌復有皎如玉樹臨風前之句玉  
樹一種斷非草本或又謂花經所載別有後庭豈花名

後庭而以玉樹嘉之耶且宋元以來或以為山礬或以為瑤花楊用修王敬美復以為丁香梔子雞冠之說何可盡信也 原花史解縉嘗侍上側上命賦雞冠花詩縉曰雞冠本是臙脂染上忽從袖中出白雞冠云是白者縉應聲曰今日如何淺淡妝只為五更貪報曉至今戴却滿頭霜

集藻賦增明仲弘道雞冠花賦并序百卉以雨露為生簷下則雨露減矣乃雨露減者霜霰亦減當草枯木落

之時此花反得因簷下而晚盛嗚呼嗇於此者豐於彼  
造化生物之盈虧固如是其難料也人奈何以目前之  
苑枯定將來之榮落邪因作賦以紀之聿觀桃李艷春  
荷蕖吐夏秋桂霜迎冬梅雪迓夢草開晨睡蓮閉夜候  
既至而芬芳蘂欲敷而莫假爰有一蕚在欄之下鷄鵲  
為羣鴨鳬作亞丹同鶴頂冠非鷗野狀鵲而不飛類  
翰音而實啞乃生長於階除托根株於簷廈日光射兮  
無多雨露霏兮亦寡方其炎蒸甫歇金風乍颺羣株炫

采爛焉盈枝爾乃瘦梗寒條較芙蓉而更寂疎根朗葉  
對籬菊其多思似班姬退處夫長門如苧蘿幽閉乎西  
施迨夫青霜降兮木落白露灑兮草萎衆卉兮凋謝爾  
獨映乎條枚涼飈凜凜兮摧之不能摧風霰飄零兮欺  
之不可欺爾於是強項獨發傲骨生姿朱紫奮采黃白  
爭奇瓣如扇而半疊子似綴而分披露盤擎兮五色仙  
掌搖兮九疑胡前者之偃蹇而後者之陸離余仰而思  
俯而惟識造物之有定理豈苦樂而無等夷然則前之

偃蹇也如甯戚之扣角如百里奚之炊芻又如蘇武之  
吞氊卧雪王章之涕泣牛衣後之陸離也如唐且華顛  
而為秦相呂尚皓首而作周師更如張蒼七十而稱漢  
佐王祥六十八而遇晉知先者未必為幸後者不足云  
遲苦者乃所釀樂樂者適足增癡物有循環之數人無  
長盛之時茲一微卉兮且然豈榮枯禍福兮而造化乃  
有所私

五言古詩原宋梅堯臣雞冠神農記百卉五色異甘酸



乃有秋花實全如雞幘丹籠煙何聳聳泣露更團團取  
譬可無意得名殊足觀逼真歸造化任巧即雕刻赤玉  
書留魏丹砂句誦韓誠能因物比誰謂入時難有客驅  
辭穎臨風運筆端嘗嗟古吟闕每惜此芳殘揣情苦精  
妙繼音慚未安 增孔平仲雞冠我初種雞冠其小乃  
毫芒曾未得幾時忽已過我長根株既猥大枝葉亦開  
張吐花凌朝曦生意殊未央陰風自西來慘淡驅清霜  
一夜忽變故葉萎花已黃當此繁盛時為爾償壺觴及

今乃腐草好翫安可常呼童盡翦拔時恐踐蹋傷庭除  
稍曠濶耳目加清涼竹枝久蒙蔽迴立獨蒼蒼原無  
名氏雞冠秋至天地閉百芳變枯草愛爾得雄名宛然  
出陳寶未甘階陋肯與時節老赤玉刻纈栗丹芝謝  
彫槁鮮鮮雲葉卷粲粲鳬翁好由來名實副何必榮華  
早君看先春花浮浪難自保增元郝經雞冠夷則播  
新律卉木協秋候綰結流火餘的皪金天宿莪莪列庭  
除摘摘儼雄秀炎帝朝火官絳幘軒宇宙植立竟不拜

離披擁青袖奕葉初類莧吐心漸如豆脉絡引絲起一

片珊瑚瘦雲芝茁紅腴紫茵卷翠脰碎顆感丹砂肉綻  
殷血透怒割赤龍耳勁礫還亂糲麻葉薄且聳山字缺  
乃覆查牙欲成角擁腫下連珠生全餘小穗展盡帶殘  
皺昂藏偃膺高突兀出羣驟還將早霞映欲向朝日睢  
月露終夜棲風雨幾回鬪再礪復自止交退誰與救區  
區閒草花象物與接構弭兵日觀戰亦是自貽咎垂簾  
且相忘高枕卧清晝

七言律詩增宋歐陽澈和世弼雞冠花芳名從古號雞  
冠赭醴醒然却一般不語宋窓何足賣難通函谷漫勞  
看倚風縱有如丹頂遇敵應無似錦翰空費栽培汚庭  
砌到頭不若植芝蘭 原明何棟如詠雞冠花日下飛  
來孰可儔雲中養就氣偏柔懶施金距當雄敵為戴霞  
冠慕遠遊獨立莓苔閒伴鶴卑栖蘋藻靜羣鷗何如化  
作幽人夢嘯破三湘萬古愁

五言絕句增宋范成大題張希賢畫雞冠號名極形似

摹寫與真逼聊以畫滑稽慰我秋園寂

七言絕句原唐羅鄴雞冠花一枝濃艷對秋光  
露滴風搖倚砌旁  
曉景乍看何處似謝家  
新染紫羅囊 宋孔

平仲種花口號幽居裝景要多般帶雨移花  
使得看禁柰久長顏色好  
繞堦更使種雞冠 王令  
白雞冠如飛

如舞對瑤臺一頂春雲若翦裁  
誰教移根萸萸畔玉雞知應太平來  
趙企詠雞冠花秋光及物眼猶迷  
著葉婆娑擬碧雞  
精采十分佯欲動五更只欠一聲曉 楊

萬里雞冠花出牆那得丈高雞只露紅冠隔錦衣却是  
吳兒工料事會稽真箇不能唬 陳倉金碧夜雙斜一  
隻今栖紀消家別有飛來矮人國化成玉樹後庭花  
錢熙雞冠花亭亭高出竹籬間露滴風吹血未乾學得  
京城梳洗樣舊羅包却綠雲鬟 趙山臺雞冠花木雞  
不與衆雞同曾逐旌陽上碧空學得仙家餐玉法至今  
木血不能紅 楊巽齋雞冠花擢擢高花血染猩却憐  
金距起閒爭宋家窓下宜栽此莫問臨風不解鳴 增

元姚文奐題畫雞冠花何處一聲天下白霜華晚拂絳  
雲冠五陵鬪罷歸來後獨立秋亭血未乾

詩散句原宋百氏集雨餘疑飲啄風動欲飛鳴對立  
如期鬪初開若欲飛增明沈周高冠紅突兀獨立似  
晨雞原宋黃庭堅紫冠黃鈿網絲窠蝶繞蜂圍奈晚  
何楊萬里有時風動頭相倚似向階前欲鬪時郭  
應祥西風吹得一枝生昂首風前不飛去

別錄原種植清明下種喜肥地用簸箕扇子撒種則成

大片高者宜以竹木架定庶遇風雨不摧折卷曲

### 水仙

增長物志水仙六朝人呼為雅蒜 南陽詩注此花外

白中黃莖幹虛通如蔥本生武當山谷間土人謂之天

蔥 原水仙叢生下濕地根似蒜頭外有薄赤皮冬生

葉如萱草色綠而厚春初於葉中抽一莖莖頭開花數

朶大如簪頭色白圓如酒杯上有五尖中承黃心宛然

盞樣故有金盞銀臺之名

見洛陽花木記

其花瑩韻其香清幽



一種千葉者花片卷皺下輕黃上淡白不作杯狀世人  
重之指為真水仙一云單瓣者名水仙千葉者名玉玲  
瓏

本草云蓋一物二種耳學圃餘疏云以單  
葉者為貴出嘉定短葉高花最佳種也

亦有紅花

者此花不可缺水故名水仙根味苦微辛寒滑無毒治  
癰腫及魚骨鯁花作香澤塗身理髮去風氣

彙考增三餘帖和氣旁薄陰陽得理則配玄榮於庭配  
玄即今水仙花也一名儷蘭一曰女星散為配玄內  
觀日疏姚姥住長離橋十一月夜半大寒夢觀星墜於

地化為水仙花一叢甚香美摘食之覺而產一女長而  
令淑有文因以名焉觀星即女史在天柱下故迄今水  
仙花名女史花又名姚女花 集異記薛藤河東人幼  
時於窓櫺內窺見一女子素服珠履獨步中庭歎曰良  
人游學艱於會面對此風景能無悵然於袖中出畫蘭  
卷子對之微笑復淚下吟詩其音細亮聞有人聲遂隱  
於水仙花下忽一男子從叢蘭中出曰娘子久離必應  
相念阻於跬步不啻萬里亦歌詩二篇歌已仍入叢蘭

中蓀苦心強記驚訝久之自此文藻異常一時傳誦謂

二花為夫婦花 原清冷傳湯夷華陰人服水仙八石

為水仙是名河伯 增三柳軒雜識水仙為雅客 學

圃餘疏水仙宜置瓶中前接蠟梅後接江梅真歲寒友

也 瓶史水仙神骨清絕織女之梁玉清也 瓶花譜

水仙一品九命 原花史謝公夢一仙女畀水仙花一

束明日生謝夫人長而聰慧能吟詠 唐玄宗賜號國

夫人紅水仙十二盆盆皆金玉七寶所造 宋楊仲因

自蕭山致水仙一二百本極盛乃以兩古銅洗蕝之學  
洛神賦體作水仙花賦

集藻賦增宋高似孫水仙花前賦有序水仙花非花也  
幽楚窈眇脫去埃滓全如近湘君湘夫人離騷大夫與  
宋玉諸人世無能道花之清明者輒見乎辭天以一而  
生神坎以習而成玄渫沖奧以致潤抱孤貞以成妍禹  
何智以能海義何神而開乾際壑烝之無畔壯英心之  
自仙悲莫悲乎巫咸之鄉哀莫哀乎原胥之淵迅英挺

以如濯肯徘徊而自憐至若鮫館截綃而凝霜貝庭含  
璣而媚川蒼茫乎三島之接霧杳眇乎十洲之滙天雲  
雨閑霽水空澄鮮一色如磨萬波不顛亦有帝女兮泣  
竹湘君兮鼓絃神妃兮解佩冰夷兮扣舷是皆凝姿約  
素挺粹含媚以婉自將以淑相宣芳以氣屬妙以辭傳  
指北渚以將下薄西津而驟旋或搴芳若或采佳荃有  
蘭可餐有蘋可搴於是樂極忘歸塵空失蠲萬慮俱泯  
餘情獨筌扣冰娥以勺眇訪瑤母而潔嫺挹水星以請

命託神祇而垂甄已矣乎超萬劫以自蛻麗一微而獨  
涓懷琬琰以成潔抱雪霜以為堅參至道以不死秉至  
精而長年是蓋苞水德之靈長合五行之自然者乎

水仙花後賦有序余既作前水仙賦疑不足以渫余之  
情者乃依稀洛神賦為後辭尚庶幾乎余從太史游覽  
山川汎瀟汨下澧沅摩嶷雲息梧烟歲莫天寒僕痛車  
顛爾乃釋鑣乎蒞涯進秣乎芝廬周旋乎荆澣騁望乎  
湘淵於是神疑目駭心離意惻即之懽悅適焉髣髴覩

一美人於水之側乃拊從者而訊之曰汝有識於彼者  
乎彼何人者甚閑且潔也從者進曰僕聞茲水之靈曰  
湘夫人然則太史公之所遇其或是乎其形維何僕願  
知之余告之曰其狀也皓如鷗輕朗如鵠停瑩浸玉潔  
秀含蘭馨清明兮如閨風之翦雪皎淨兮如瑤池之宿  
月其始來也炯然層冰出蛟壑其徐進也粲然清霜宿  
瓊枝沈詳弗矜燕婉中度不穠不纖非怨非訴美色含  
光輕姿約素瓌容雅態芳澤不汚素質窈窕流暉嫵媚

抱德貞亮吐心芳  
蠲婉幽靜志泰神閑  
柔於修辭既  
丰且鮮飭躬被服  
稽圖合章峨五采之英珥兮錯九芝  
之明璫舞碧霓之修帶兮妥英雲之輕裝  
頗有鍊而如  
灼體非薰而彌香  
沐姱容之練練乘清氣之徜徉於是  
舒懷肆逸且娛且  
顰羽蓋翳映翠旄  
繽紛躡金搖之欲  
墮兮玩晴洲之青蘋  
余衷耽其靜變兮黯  
淡蕩而馳神  
媒不靈於締歡兮託  
湘波以通勤暢中靈  
之胥悟兮捐  
余璫於水濱懿玉儀  
之靜莊允約矩而應  
規輕瑤華而



不御兮指二南而揚詩謂皎日之可鑒兮非暗室之自欺數解佩之夙遇兮風嫋嫋而凝思志貞介而言妙兮誓守禮以將之於是靈修竦然嫵婉徘徊拊孤影以欲翦心將飛而仍回褰蓀幃之芳烈燕芷房之玫瑰感幽志之淒激兮喟揚音而彌哀爾乃衆真縹緲並游嘯侶或濟西瀛或臨北渚或采幽蘅或茹芳杜約洛川之神妃會巫陰之奇女清莫清乎姮栖愁莫愁乎牛渚娟輕裾之裔裔冷清飈而雲舉體迅飛鴻倏若輕雲流睇橫

波餘芳氤氲其度有則不顛不危優柔靡忒必兢必祇  
溫乎如玉曄兮陸離精采相授羌余其悲於是川后斂  
颺冰夷却濤龍伯獻珠蛟人貢綃躍三蚪以指塗蕤蒼  
芝而夾御雙螭帖其馴乘儼華旂之布濩鴛鴦嘯而先  
驅翡翠翼而齊驚於是趨彭蠡過洞庭洗月轂飛星輶  
流清聲而吐奇誦坤乾之大經畫三靈而不汨潛一意  
而長醒恍揚袂以如失雪微汎而霑纓拊佳期之不來  
日冉冉而西征復微素之孰寄誰其將余英瓊揚清波

而微注指潛淵而自驚恍精采之相授迄難陳其餘情  
於是游倦思歸路異神留遺思杳眇寤寐好逌蹇悠悠  
而何之指寒川而薄憩蘭菲菲而襲余睇碧雲而搖曳  
信心會而神交豈綢繆之未契竦僕夫之微余命速駕  
乎蘭枻其毋惑於所悅當陳古而為之制 元任士林  
水仙花賦眇伊人之蟬蛻兮宅清冷以為扉越蓬隔弱  
窅不知其幾千里兮跂余望之忽軒窓之翠碧兮見此  
綽約之芳姿曳青蔥之華裾兮倚玉薤之披披逍遙清

霜之夕徘徊明月之辰佩乞碧霞衣紉綠雲金杯盥雨  
玉盤承津醕和注淳斟酌天均於時庭空人靜萬竅不  
作聲沉步虛之歌奏香鈞天之樂江妃具俎以進羞海  
若克賓而酌酢持杜觶而未揚想堂中之歡樂余亦洗  
醖更酌接芳蕤而為客縱歌頽然不知天河之既落  
明姚綬水仙花賦伊昔涪翁夙罹謫逐行邁阻修浮水  
奔陸方歸與以息駕乃燕坐於葭屋惟是屋也依高山  
臨大江影薄高雲聲飛怒瀧敞宇衡門洞乎八窓式遣

懷於吟嘯忽有覩乎神媿爾乃乍近乍遙水面微步羅  
韞生塵綃裳沾露腰纖弱蘭脣冶樊素匪揚桂旗匪躅  
神魚遽引遽却或疾或徐袖翩翩兮婉婉帶繚繞兮紆  
舒悵數年之獨往鄙良夜以鰥居矯望延佇掠盼躊躇  
汎若斷梗浮猶馮虛乃若貼金蓮於玉趾眷茲樂胥於  
焉邇止瑪瑙坡荒仙王祠圯睇梅兄於嶺頭懷礬弟於  
澗溪進左右而諗之曰水上步月彼其仙邪惟炫素質  
不御鉛華中有金蕤輕蒙臂紗衝斤暮雨揮霍朝霞爾

或見之而豈吾之過誇邪左右屏息對曰彼之來斯誠  
類仙子馨香芬芳容光旖旎其綽約也儼藐姑之神其  
聯娟也齊洛川之子初雖瞻馳終莫摹擬是則主人之  
所見僕輩之所跂者也於是之時涪翁啞然而作聲彼  
人泯然而無迹江風惟清江月自白偃偃何之翳翳寢  
息晨興向明躑躅於庭忽幽花之托根依后土以降靈  
胡然生之大瘦歲晏流形宋玉招魂之賦莊周夢蝶之  
經翁遙作詩調同金石有頃比夕載驗厥跡無被花之

懊惱出門一笑而橫大江之空碧

五言古詩增宋陳與義詠水仙花五韻仙人緇色裘縞  
衣以裼之青幌紛委地獨立春風時吹香洞庭暖弄影  
清晝遲寂寂籬落陰亭亭與予期誰知園中客能賦會  
真詩 朱子賦水仙花隆冬凋百卉江梅厲孤芳如何  
蓬艾底亦有春風香紛敷翠羽帔溫艷白玉相黃冠表  
獨立淡然水仙裝弱植愧蘭蓀高標摧冰霜湘君謝遺  
襟漢水羞捐璫嗟彼世俗人欲火焚衷腸徒知慕佳冶

詎識懷貞剛淒涼柏舟誓惻愴終風章卓哉有遺烈千  
載不可忘 陳傳良水仙花江梅丈人行歲寒固天姿  
蠟梅微著色標致亦背時胡然此柔嘉支本僅自持迺  
以平地尺氣與松篁夷粹然金玉相承以翠羽儀獨立  
萬槁中冰膠雪垂垂水仙誰強名相宜未相知刻畫近  
脂粉而況山谷詩吾聞抱太和未易形似窺當其自英  
華造物且霽威平生恨剛褊未老齒髮衰掇花寘膽瓶  
吾今得吾師 許仲企水仙花定州紅花堯塊石藝靈



苗芳苞茁水仙厥名為玉霄適從閩越來綠綬擁翠條  
十花冒其顛一一振鷺翹粉蕤間黃白清香從風飄回  
首天台山更識膽瓶蕉

七言古詩原宋黃庭堅王充道送水仙花五十枝凌波  
仙子生塵韞水上盈盈步微月是誰招此斷腸魂種作  
寒花寄愁絕含香體素欲傾城山礬是弟梅是兄坐對  
真成被花惱出門一笑大江橫

五言律詩增元錢選水仙花圖帝子不沉湘亭亭絕世

妝曉烟橫薄袂秋瀨韻明璫洛浦應求友姚家合讓王  
殷勤歸水部雅意在分香

七言律詩增宋韓維謝到水仙二本黃中秀外幹虛通  
乃喜嘉名近帝聰密葉暗傳深夜露殘花猶及早春風  
拒霜已失芙蓉艷出水難留菡萏紅多謝使君憐寂寞  
許教綽約伴山翁楊萬里詠千葉水仙花并序世以  
水仙為金盞銀臺蓋單葉者其中有一酒盞深黃而金  
色至千葉水仙其中花片捲皺密感一片之中下輕黃

而上淡白如染一截者與酒杯之狀殊不相似安得以  
舊日俗名辱之要之單葉者當命以舊名而千葉者乃  
真水仙云薤葉蔥根兩不差重蕤風味獨清嘉薄揉肪  
玉圍金鈿細染鵝黃刺素紗臺淺原非千葉種丰容要  
是小蓮花向來山谷相看日知是他家是當家 水仙  
花生來弱體不禁風匹似蘋花較小豐腦子濃熏衆香  
國江妃寒損水晶宮銀臺金盞談何俗簪弟梅兄品未  
公寄語金華老仙伯凌波仙子更凌空 原劉克莊水

仙花歲華搖落物蕭然一種清風絕可憐不許淤泥侵  
皓素全憑風露發幽妍騷魂灑落沉湘客玉色依稀捉  
月仙却笑涪翁太脂粉誤將高雅匹嬋娟 增元仇遠  
題趙子固水墨雙鉤水仙卷冰薄沙昏短草枯采香人  
遠隔湘湖誰留夜月羣仙珮絕勝秋風九畹圖白粲銅  
盤傾沆瀣青明寶玦碎珊瑚却憐不得同蘭蕙一識清  
醒楚大夫 鄧文原題趙子固水墨雙鉤水仙卷仙子  
凌波佩陸離文魚先乘殿馮夷積冰斲雪揚靈夜鼓瑟

吹竽會舞時海上瑤池春不斷人間金盃事堪疑天寒

日暮花無語清淺蓬萊當問誰原明屠隆詠水仙花

娟娟湘洛淨如羅幻出芳魂儼素娥夜靜有人來鼓瑟  
月明何處去凌波蕭疎冷艷冰綃薄綽約風鬟露氣多  
直是靈根堪度世妖容知不傍池荷梁辰魚詠水仙

花幽修開處月微茫秋水凝神黯淡妝繞砌霧濃空見  
影隔簾風細但聞香瑤壇夜靜黃冠濕小洞秋深玉珮  
涼一段凌波堪畫處至今詞賦憶陳王

五言絕句增宋楊萬里水仙花韻絕香仍絕花清月未  
清天仙不行地且借水為名 開處誰為伴蕭然不可  
鄰雪宮孤弄影水殿四無人 原明于若瀛詠水仙水  
花垂弱蒂嫋嫋綠雲輕自足壓羣卉誰言梅是兄 增  
王穀祥水仙花仙卉發瑤英娟娟不染塵月明江上望  
疑是弄珠人 瑤環月下鳴翠帶風中舉胡然洛浦神  
胡然漢濱女 陳淳水仙玉面嬋娟小檀心馥郁多盈  
盈仙骨在端欲去凌波 荒圃淑氣回寒柯發光澤下

有白玉花玲瓏映深碧

七言絕句

御製見案頭水仙花偶作二首翠帔緗冠白玉珈清姿終不  
汙泥沙騷人空自吟芳芷未識凌波第一花 冰雪為肌  
玉鍊顏亭亭如立藐姑山羣花只在軒窗外那得移來几  
案間

增宋陳搏詠水仙花湘君遺恨付雲來雖墮塵埃不染  
埃疑是漢家涵德殿金芝相伴玉芝開 劉放水仙花

早於桃李晚於梅冰雪肌膚姑射來明月寒霜中夜靜

素娥青女共徘徊 黃庭堅共郡送水仙花并二大本

折送東園粟玉花併移香本到寒家何時持上玉宸殿

乞與官梅定等差 劉邦直送水仙花得水能仙天與

奇寒香寂寞動冰肌仙風道骨今誰有淡掃蛾眉簪一

枝 錢塘昔聞水仙廟荊州今見水仙花暗香靚色撩

詩句宜在林逋處士家 次韻中玉水仙花二首借水

開花自一奇水沉為骨玉為肌暗香已壓荼蘼倒只比



寒梅無好枝 淤泥已作白蓮藕  
糞壤能開黃玉花可

惜國香天不管隨緣流落野人家  
張耒賦水仙花宮

樣驚黃綠帶垂中州未省見仙姿  
只疑湘水綃機女來

伴清秋宋玉悲 范成大次韻龔養正  
送水仙花色界

香塵付八還正觀不起况邪觀  
花前猶有詩情在還作

凌波步月看 楊萬里水仙花江妃  
虛却藥珠宮銀漢

仙人謫此中偶趁月明波上戲  
一身冰雪舞東風 額

間拂煞御袍黃衣上偷將月姊香  
待倩春風作媒妁西

湖嫁與水仙王 張孝祥和人詠水仙花二首瘴土風

煙那有此只疑姑射是前身仙風道骨難消得付與霜

臺衣繡人 淨色只應撩處士國香今不落民家江城

望斷春消息故遣詩人詠此花 朱子用子服韻謝水

仙花水中仙子來何處翠袖黃冠白玉英報道幽人被

渠惱著詩送與老難兄 姜特立水仙六出玉盤金屈

卮青瑤叢裏出花枝清香自信高羣品故與江梅相並

時 徐似道水仙花二首天然初不事鉛華此是無塵

有韻花翠帶詎容縈俗客金杯只合勸詩家  
林下清風自一家稍親梅竹近蘭芽只緣羞與凡花伍移植名園不肯花  
游寒巖水仙花二首金玉其相一兩花遐心空為爾興嗟山礬不用來修敬只許江梅共一家

黃琮白璧綴幽花珍重高人為嘆嗟織女橫河溪月墮杯盤狼籍水仙家  
來氏水仙花二首瑤池來宴老仙家醉倒風流萼綠華白玉斷筭金暈頂幻成癡絕女兒  
花  
花盟平日不曾寒六月曝根高處安待得秋殘親

手種萬姬圍繞雪中看  
元張伯淳題趙子固水仙圖

裙長帶裊寒偏耐玉質金相密更奇見畫如花花似畫

西興渡口晚晴時  
陳旅題水仙花圖莫信陳王賦洛

神凌波那得更生塵水香露影空清處留得當年解珮

人  
袁士元水仙醉欄月落金杯側舞倦風翻翠袖長

相對了無塵俗態麻姑曾約過潯陽  
姚文奐題虞瑞

巖描水仙花離思如雲賦洛神花容婀娜玉生春凌波

韞冷香魂遠環珮珊珊月色新  
原倪瓚水仙花曉夢

盈盈湘水春翠蚪白鳳照江濱香魂莫逐冷風散擬學

黃初賦洛神 增丁鶴年水仙花二首湘雲冉冉月依

依翠袖霓裳作隊歸怪底香風吹不斷水晶宮裏宴江

妃 影娥池上曉涼多羅韞生塵水不波一夜碧雲凝

作夢醒來無奈月明何 明李東陽題水仙澹墨輕和

玉露香水中仙子素衣裳風鬟霧鬢無纏束不是人間

富貴妝 原文徵明水仙羅帶無風翠自流晚寒微暝

玉搔頭九疑不見蒼梧遠憐取湘江一片愁 增杜大

中水仙二首玉貌盈盈翠帶輕  
凌波微步不生塵風流  
誰是陳思客想像當年洛水人  
靈雨濛濛幻態輕驚  
魂想像逝懷傾願將玉珮遙相逐  
脫骨逍遙水上人

張新水仙花玉質金相翠帶圍  
霜華月色共輝輝江妃  
方欲凌波去漢女初從解珮歸  
孫齊之水仙花碧江  
香和楚雲飛銷盡冰心粉色微  
乍向月中看素影却疑  
波上步靈妃  
鍾惺暮春水仙花偶向殘冬遇  
洛神孤  
情只道立先春  
今從九月過三月疑是前身與後身

物值同時妒亦宜梅花今見子離離相逢洞口千紅裏  
素影當前君不知 萬花如燄柳如烟常恐冰綃畏不  
前曾在水邊衣不濕可知入火不能然 每笑梅花太  
畏喧一身自許歷寒溫春風特念冰霜後邀與春花共  
慰存

詩散句原宋僧船窓如聞交佩解疑是洛妃來朔吹欺  
羅袖朝霜滋玉臺 徐致中薤葉秀且聳蘭香細而幽  
林洪翠帶拖雲舞金卮照雪斟 增鄭清之玉昆相

倚帶仙風壁立春前萬卉空  
錢勰碧玉簪長生洞府  
黃金杯重壓銀臺  
僧北澗華裾冉冉低香綬柔玉稜  
稜襯嫩金  
原徐似道曉風洛浦凌波際夜月江皋解  
珮時

詞增宋趙潛長相思金璞明玉璞明小小杯杓翠袖擎  
滿將春色盛  
仙佩鳴玉佩鳴雪月中過洞庭此時  
人獨清  
原盧祖臯卜算子珮解洛波遙弦冷湘江渺  
月底盈盈誤不歸獨立風塵表  
窓綺護幽妍瓶玉扶



輕裊到後知誰語素心寂寂山寒峭

增謝過菩薩蠻

相思一夜庭花發窗前忽誤生塵鞢曉起艷寒妝雪肌

生暗香 佳人纖手摘手與花同色插鬢有誰宜除非

潘玉兒 原高觀國菩薩蠻雲嬌雪妒羞相倚凌波共

酌春風醉的皪玉壺寒肯教金盞單 只疑雙蝶夢翠

袖和香擁香外有鴛鴦風流煙水鄉 增無名氏菩薩

蠻人人盡道黃葵淡儂家解說黃葵艷可喜萬般宜不

勞朱粉施 摘承金盞酒勸爾千春壽擎作女真冠試

伊嬌面省 又高梧葉下秋光晚珍叢花出黃金盞還

似去年時傍欄三兩枝 人情須耐久花面長依舊莫

學蜜蜂兒等閒悠颺飛 原曾惇朝中措幽芳獨秀在

山林不怕曉寒侵應笑錢唐蘇小語嬌終帶吳音 乘

槎歸去雲濤萬頃誰是知心寫向生綃屏上蕭然伴我

寒衾 又綠華居處渺雲深不受一塵侵細看宜州新

句平生纔是知音 凌波一去平生夢斷誰最關心惟

有青天碧海知渠夜夜孤衾 增無名氏偷聲木蘭花

景陽樓上鐘聲曉半面唬妝勻未了殘月紛紛斜影幽

香暗斷魂玉顏應在昭陽殿却向前村深夜見冰雪

肌膚還有斑斑雪點無南歌子翠袖熏龍腦烏雲映

玉臺春蔥一簇屬金杯曾記西樓同醉角聲催嫋嫋

凌波淺深深步月來隔紗微笑恐郎猜素艷濃香依舊

去年開馬莊父天仙子白玉為臺金作盞香是江梅

名閨苑年時把酒對君歌歌不斷杯無算花月當樓人

意滿翹戴一枝蟬影亂樂事且隨人意換西樓回首

月明中花已綻人何遠可惜國香天不管  
原高觀國

金人捧露盤夢湘雲吟湘月弔湘靈有誰見羅襪塵生  
凌波步穩背人羞整六銖輕娉娉裊裊暈嬌黃玉色輕  
明香心靜波心冷琴心怨客心驚怕珮解却返瑤京  
杯擎清露醉春蘭交與梅兄蒼煙萬頃斷腸是雪冷江  
清增陳允平念奴嬌漢江露冷是誰將瑤瑟彈向雲  
中一曲清泠聲漸杳月高人在珠宮暈額黃輕塗腮粉  
艷羅帶織青蔥天香吹散珮環猶自丁東  
回首杜若

汀洲金鈿玉鏡何日得相逢獨立飄飄煙浪遠羅襪羞  
賤春紅渺渺予懷迢迢良夜三十六陂風九疑何處斷  
魂飛度千峰 周密花犯楚江湄湘娥乍見無言灑清  
淚淡然春意空獨倚東風芳思誰記凌波路冷秋無際  
香雲隨步起謾記漢宮仙掌亭亭明月底 冰絃寫怨  
更多情騷人恨枉賦芳蘭幽芷春思遠誰賞國香風味  
相將共歲寒伴侶小窓淨沉煙熏翠被幽夢覺涓涓清  
露一枝燈影裏 趙聞禮水龍吟幾年埋玉藍田綠雲

翠水烘春暖衣薰麝馥韞羅塵沁凌波步淺鈿碧搔頭  
膩黃冰腦參差難翦乍聲沉素瑟天風珮冷踟躕舞霓  
裳徧 湘浦盈盈月滿抱相思夜寒腸斷含香有恨招  
魂無路瑤琴寫怨幽韻淒涼暮江空渺數峰清遠絮迎  
風一笑持花酹酒結南枝伴 王沂孫慶春宮明玉擎  
金纖羅飄帶為君起舞回雪柔影參差幽芳零亂翠圍  
腰瘦一捻歲華相誤記前度湘皋怨別哀絃重聽都是  
淒涼未須彈徹 國香到此誰憐烟冷沙昏頓成愁絕

花惱難禁酒銷欲盡門外冰漸初結試招仙魄怕今夜  
瑤簪凍折攜盤獨出空想咸陽故宮落月 趙雪齋金

盞子得水能仙向漢臯遺佩碧波涵月藍玉暖生煙稱  
縞袂黃冠素姿冰潔亭亭獨立風前柰香多愁絕當時  
事琴心妙處雖傳有誰堪說 歲晚杳無人更短景繁

雲天欲雪瀟湘煙水茫茫但萬里相思寒江空濶殷勤  
折向梅邊聽玉龍吹徹丁寧道惟願百年兄弟相看晚  
節 原辛棄疾賀新郎雲臥衣裳冷看蕭然風前月下

水邊幽影羅襪塵生凌波步湯沐煙波萬頃愛一點嬌  
黃成暈不記相逢曾解珮甚多情為我香成陣待和淚  
搵殘粉 靈均千古懷沙恨想當初恩恩忘把此花題  
品煙雨淒迷僂僂損翠袂遙遙誰整謾寫入瑤琴幽憤  
絃斷招魂無人賦但金杯的皪銀臺潤愁殢酒又還醒  
別錄原種植五月初收根用小便浸一宿曬乾拌濕土  
懸當火煙所及處八月取出瓣瓣分開用猪糞拌土植  
之植後不可缺水起時種時若犯鐵器永不開花訣云



六月不在土七月不在房栽向東籬下寒花朵朵香又  
云和土曬半月方種以收陽氣覆以肥土白酒糟和土  
澆之則茂 于若瀛曰水仙江南處處有之惟吳中嘉  
定種為最花簇葉上他種則隱葉內耳蓄種囊以紗懸  
於梁間風之未播先以敝草履寸斷雜溲溲浸透俟有  
生意方入土以入土早晚為花先後金陵即善植者十  
叢不一二花余每歲向友人乞三四莖置齋頭香可十  
日茲十日者縱非風雨亦不易出齋頭也 水仙花以

精盆植之可供書室雅翫 愛護霜重時即搭棚遮蓋  
以避霜雪向南開一門天晴日暖則開之以承日色北  
方土寒凡牡丹貼梗海棠皆用此法不特水仙也又法  
初起葉時以磚壓住不令即透則他日花出葉上杭州  
近江處園丁種之成林以土近鹹澇故花茂 瓶插插  
瓶用鹽水與梅花同

附錄  
裱祇

增酉陽雜俎裱祇出拂菻國根大如雞卵葉長三四尺

似蒜中心抽條莖端開花六出紅白色花心黃赤不結

子冬生夏死取花壓油塗身去風氣

本草云據此形狀與水仙髣髴豈外

國名謂不同耶

附錄水仙樹

原拘樓國有水仙樹樹腹中有水謂之仙漿飲者七日醉

御定佩文齋廣羣芳譜卷五十二

謹案卷五十一第十六頁後一行寂寞酒醒人散  
後刊本散訛醉據山谷詞改


第十七頁前三行落葉西園風嫋嫋刊本葉訛落  
據六一詞改

卷五十二第六頁後三行露滴風搖倚砌旁刊本  
倚訛向據唐詩本改

第二十頁後八行待倩春風作媒的刊本的訛却  
今改

第二十五頁前八行偷聲木蘭花刊本偷聲作減

字據詞律改



總校官庶吉士臣侍朝

校對官編修臣朱攸

謄錄監生臣魏綿曾

欽定四庫全書薈要

子部

御定廣羣芳譜卷五十三

臣

王杰詳校

詳校官主事

臣陳木

欽定四庫全書薈要卷一萬六百十六

子部

御定佩文齋廣羣芳譜卷五十三

花譜

萬年花

萬年花草本小朶如盞一莖百朶其色粉紅而有紅

絲雖經久乾枯及沾泥汙顏色鮮新不變

御賜名曰萬年花

金蓮



增金蓮花出山西五臺山塞外尤多花色金黃七瓣兩層花心亦黃色碎藥平正有尖小長狹黃瓣環繞其心一莖數朶若蓮而小六月盛開一望徧地金色爛然至秋花乾而不落結子如粟米而黑其葉綠色瘦尖而長五尖或七尖

彙考增遼史營衛志道宗每歲先幸黑山拜聖宗興宗陵賞金蓮乃幸子河避暑洛陽花木記金蓮花出嵩山頂周伯琦上都紀行詩註上都草多異花有名金

蓮花者似荷而黃 五臺山志山有旱金蓮如真金挺  
生綠地相傳是文殊聖蹟

集藻賦

御製金蓮花賦倅嘉名於華頂結異質於清涼冠方貢之三  
品賦正色於中央摹芙蓉而在陸麗菡萏於崇岡顧柳池  
之非偶豈蘋澗之可方煥彪炳而成文散梅檀而結燼烟  
橫鉢裏之香妝沐江干之靚受範公輸之規秘芳彭澤之  
徑田田與芰蓋殊形矯矯並木蘭比勁若夫當融風之拂

樹值暑雨之平池面鏡潭而寫色掩玉砌以橫枝葉潤陵  
晨之霧花含照夜之珠襲輕芬於衣縠映斜月於牕帷本  
托根於道岸曾何畏乎泥淄爾乃草鋪微綠之區蝶舞輕  
黃之翅沾芳則土脈流膏落葉則蜜脾分饋非桃李而成  
蹊與鞠衣而同製於是滴珠露以研黃挹金房而瀉翠玉  
板潤而脂融松腴蒸而雲翳摘珍產於山經表奇芳於幽  
閔異紅采於巖阿謝朱霞於水曲漏鐫長樂之銅壺燈燦  
蓬山之銀燭卑五華之仙葩超四照之靈木彼夫綠竹則

稱君子青松以儼大夫澤荷載於篇什猗蘭紀於史書惟  
斯卉之挺秀拔衆彙而標竒感無言於空谷久掩嫫于山  
陂移土礎於上苑沐日月之光曦化同被於偃草忱獲效  
乎傾葵

詞

御製嶺外金蓮盛放可愛寄調柳梢青萬頃金蓮平臨難盡  
高眺千般珠蹙移花翠翻帶月無暑神仙 俗人莫道輕  
寒悠雅處餘香滿山嶺外磊落遠方隱者誰似清閒

# 苾碧花

增山海經罷谷之山泝水出焉而西流注於洛其中有  
苾碧 雲南志浪穹縣西北五里有寧河一名苾碧湖  
水上有花曰苾碧形如蓬而差小有白者有淺紅錦邊  
者葉如荷葉花葉本皆長五六丈晝則上浮夜則拳曲  
入底微風蕩之香氣殊常采以為羹味美於蓴

集藻詩散句增明楊慎荒經海圖有往證欲拾苾碧尋  
靈湫

九花樹

增要覽九花樹生南岳雖經霜凝寒必開時人謂之應春花

萬連

增崔豹古今注萬連葉如鳥翅一名鳥羽一名鳳翼花大者其色多紅綠紅者紫點綠者紺點俗呼為仙人花一名連纈花 酉陽雜俎一名烏蓬

金磴花

增拾遺記晉武帝為撫軍時府內後堂砌下忽生草三  
株莖黃葉綠若總金抽翠花條苒弱狀似金釐有羌人  
姚馥字世芬充廐養馬妙解陰陽之術云此草以應金  
德之瑞後以府地賜張華猶有草在故茂先賦云擢九  
莖於漢庭美三株於茲館貴表祥乎金德比名類乎相  
亂

紅綬花

增述異記紅綬花蔓生如綬一般有文采焉

優鉢曇花

增梁書波斯國傳國中有優鉢曇花鮮華可愛

迎輦花

增拾遺錄洛陽進合蒂迎輦花云得之嵩山塢中人不  
知名採者異而貢之會帝駕適至因以迎輦名之南  
部烟花記迎輦花外殷紫內素膩菲芳粉蕊心深紅跗  
爭兩花枝幹烘翠類通草無刺葉圓長薄其香氣濃芬  
馥或惹襟袖移日不散嗅之令人不多睡帝令表寶兒



持之號曰司花女

金步搖

增海錄碎事金步搖叢生其花四出皆偶對無風常搖  
蓋幹弱而枝繁也

靈壽花

增酉陽雜俎韋絢云湖南有靈壽花數帶簇開視日如  
槿紅色春秋皆發非作杖者

都勝花

增酉陽雜俎都勝花紫色兩重心數葉卷上如蘆朶蕊  
黃葉細

無憂花

增酉陽雜俎無憂樹女人觸之花方開

瘴川花

增酉陽雜俎瘴川花差類海榴五朶簇生葉狹長重沓  
承於花底色中第一蜀色不能及出黎州按轡嶺

那伽花

增酉陽雜俎那伽花狀如三春無葉花色白心黃六瓣  
出舶上

提羅迦

增酉陽雜俎提羅迦樹花見日光即開

拘尼陀

增酉陽雜俎拘尼陀樹花見月光即開

繫白象樹花

增酉陽雜俎乾陀國頭河岸有繫白象樹花葉似棗季

冬方熟相傳此樹滅佛法亦滅

簇蝶花

增酉陽雜俎簇蝶花花為朶共簇一蕊蕊如蓮房色如  
退紅出溫州

俱那衛

增酉陽雜俎俱那衛葉如竹三莖一層莖端分條如貞  
桐花小類木槲出桂州

木蓮

增酉陽雜俎木蓮花葉似辛夷花類蓮花色相傍出忠  
州鳴玉溪邛州亦有益部方物畧記木蓮花生峨眉  
山中諸谷狀若芙蓉香亦類之木榦花夏開枝條茂蔚  
不為園圃所蒔雲南志木蓮花出大理府境樹高大  
葉如枇杷花如蓮有青黃紅白四種

彙考原四川志忠州白鶴山佛殿前唐時有木蓮二株  
其高數丈其葉堅厚如桂仲夏作花每花坼時聲如破  
竹增黃山志木蓮花在華嚴堂前其本踰拱高二丈

花如蓮九瓣白色紫縷香如玉蘭葉經霜不彫朱實含  
苞內苞開實出若珊瑚新琢止慈光寺一本 點蒼山  
記山有木蓮躑躅花樹並高數丈春日紅白錯雜被於  
谿谷

集藻贊增宋宋祁木蓮贊葩秀木顛狀若芙蕖不實而  
榮馥馥其敷

賦增唐無名氏木蓮賦蔽茅珍樹森林綺堂庇根天壤  
擢秀春光雖遠性於舊國終奉恩於此鄉遠性何苦主

人有勿翦之怙奉恩何其主人有挈瓶之滋君既加我以惠好我亦報君以歲蕤弱其枝圓其葉亂階前之蔭莢跗綠縟萼芊茸狀中浦之芙蓉既因其理又憐其美懷香則十步必聞含笑則千金可市有實雖漏於貢納有陰足延乎憩止此木也誠則不材必姑樹其桃李

七言絕句增唐白居易木蓮詩并序木蓮樹生巴峽山谷間巴民亦呼為黃心樹大者高五丈涉冬不凋身如青楊有白文葉如桂厚大無脊花如蓮香色艷膩皆同

獨房蕊有異四月初始開自開迨謝僅二十日忠州西  
北十里有鳴玉谿生者穠茂尤異惜其遐僻因題三絕  
句云如折芙蓉栽旱地似拋芍藥挂高枝雲埋水隔無  
人識唯有南賓太守知 紅似胭脂膩如粉傷心好物  
不須臾山中風起無時節明日重來得在無 已愁花  
落荒巖底復恨根生亂石間幾度欲移移不得天教拋  
擲在深山 畫木蓮花圖寄元郎中花房膩似紅蓮朶  
艷色鮮如紫牡丹唯有詩人能解愛丹青寫出與君看



詩散句增明吳廷簡龍象天家錫瑤花佛地來池將空  
作水根以樹為臺 宋漁枝懸縞帶垂金彈瓣落蒼苔  
墜玉杯

石蓮

增黃山志石蓮花畧同木蓮但彼九出此五出為異花  
時瀰漫山谷盈目皆香雪也

集藻五言絕句增唐司空曙石蓮花今逢石上生本自  
波中有紅艷秋風裏誰憐衆芳後

# 洛如花

增雲仙雜記吳興山中有一樹類竹而有實似莢狀鄉人見之以問陸澄澄曰名洛如花郡有文士則生

## 太平瑞聖花

增益部方物畧記瑞聖花出青城山中榦不條高者乃尋丈花率秋開四出與桃花類然數十跗共為一花繁密若綴先後相繼新蕊開而舊未萎也蜀人號豐瑞花故程相畫圖以聞更號瑞聖花然有數種其小者號寶

仙淺紅者為醉太平白者名玉真成都人競移蒔園中  
以為尤玩云 劔南詩注天聖中獻至京師仁宗賜名  
太平瑞聖花

集藻贊增宋宋祁瑞聖花贊衆跗聚英爛若一房有守  
繪圖厥名乃章繁而不豔是異衆芳

五言律詩增宋范成大太平瑞聖花雪外捫參嶺烟中  
濯錦州密攢文杏蕊高結綵雲毬百世嘉名重三登瑞  
氣浮挽春同住夏看到火西流

七言絕句增宋楊巽齋醉太平花紫芝奇樹謾前聞未  
若此花叶氣薰種向春臺豈無象望中秀色似卿雲

### 七寶花

增益部方物畧記七寶花條葉大抵玉蟬花類也其生  
叢蔚花葉甚茂

集藻贊增宋宋祁七寶花贊擢穎挺挺盛夏則榮丹紫  
合英以寶見名

### 鵞毛玉鳳花

增益部方物畧記鶯毛玉鳳花本至卑纖蓬如釵股秋  
開不蘄而鬢狀似禽故曰鳳色白故曰玉以其分輕故  
曰毛

集藻贊增宋宋祁鶯毛玉鳳花贊華而無采狀類翔鳳  
么質毛輕翩欲飛動

蟬花

增益部方物畧記蟬花二川山林中皆有之如蟬之不  
蛻至秋則花生其頭長一二寸黃碧色 西溪叢語本

草蟬殼謂之蟬花今成都有草名蟬花今有乾者視之  
乃蟬額裂面抽莖上有花也

集藻贅增宋宋祁蟬花贅蟬不能蛻委於林下花生厥  
首茲謂物化

### 石蟬花

增益部方物畧記石蟬花始生其莖森擢長二三尺葉  
如菖蒲紫萼五出與蟬甚類綠葉相側蜀人因名之又  
白者號玉蟬花

集藻贊增宋宋祁石蟬花贊有茗穎然有萼敷然取其  
肖象莫類於蟬

錦帶花

增杜詩注錦帶花一名海仙花一名文官花此花出荆  
楚間有花如錦遂名錦帶花條如郁李春末方開紅白  
二色益部方物畧記錦帶花蜀山中處處有之長蔓  
柔纖花葉間側如藻帶然因象作名花開者形似飛鳥  
里人亦號鬢邊嬌萬花谷貢士舉院本故勇技營有

花初開白次綠次緋次紫故名爲文官花 石湖詩注

東南甚珍此花峽中漫生山谷

集藻五言古詩增宋范成大錦帶花妍紅棠棣粧弱綠  
薔薇枝小風一再來飄飄隨舞衣吳下嫵芳檻峽中滿  
荒陂佳人墮空谷皎皎白駒詩

七言律詩增宋楊萬里錦帶花天女風梭織錦機碧絲  
池上茜纈枝何曾繫住春歸脚只解縈長客恨眉節節  
生花花點點茸茸曬日日遲遲後園初夏無題目小樹



微芳也得詩

七言絕句增宋王禹偁海仙花詩并序海仙花者世謂之錦帶維揚人傳云初得於海州山谷間其枝長而花密若錦帶然其花未開如海棠既開如木瓜而繁麗弱過之一朶滿頭冠不克荷惜其不香而無子但可鉤壓其條移植他所因以釋草釋木驗之皆無有也近之好事者作花譜以海棠為花中之神仙子謂此花不在海棠下宜以仙為號目為錦帶俚孰甚焉又取始得之

地命曰海仙且賦詩三章以存其名一堆絳雪壓春叢  
嫋嫋長條弄晚風借問開時何所似似將繡被覆熏籠  
春憎窈窕教無子天為妖嬈不與香盡日含毫難比  
並花中應是衛莊姜何年移植在僧家一簇柔條綴  
綵霞錦帶為名俚且俗為君呼作海仙花楊巽齋錦  
帶花萬釘簇錦若垂紳圍住東風穩稱身聞道沈腰易  
寬減何妨留與繫青春鵲袍換綠契初心旋賜銀緋  
與紫金堪念紛紛名利客對花應自歎侵尋

青囊花

增五代史胡嶠自契丹亡歸中國畧能道其所見云渡黑水至湯城淀地氣最溫多異花一曰青囊如中國金燈而色類藍可愛

旱金花

增五代史湯城淀地氣最溫多異花一曰旱金大如掌金色燦人

上元紅

增桂海虞衡志上元紅深紅色絕似紅木瓜花不結實  
以燈夕前後開故名

泡花

增桂海虞衡志泡花南人或名柚花春末開蕊圓白如  
大珠既折則似茶花氣極清芳與茉莉素馨相逼番人  
采以蒸香風味超勝

枸那花

增桂海虞衡志枸那花葉瘦長略似楊柳夏開淡紅花

一朶數十萼至秋深猶有之

水西花

增桂海虞衡志水西花葉如萱草花黃夏開

象蹄花

增桂海虞衡志象蹄花如梔子而葉小夏開至秋深

白鶴花

增桂海虞衡志白鶴花形如白鶴立春開

集藻七言絕句增元劉詵玉笥山中有白鶴花頂翅宛

然類鶴王蘭友作詩送至用韻二首縞衣玄爪立前除  
天上人間翦紙糊除却青青三四葉月明滿地却全無  
千載蘇仙上帝鄉空餘琪草似人長夜涼環珮不知  
處夢覺滿山風露香

望仙花

增洛陽花木記望仙亦名篋春

集藻七言絕句增宋無名氏望仙花風捲朱簾挂玉鉤  
彩雲開處望仙儔妍姿不逐東風去日照斜暉上小樓

金莖花

增仙史元藏幾航海至一島曰滄洲上有金莖花如蛺蝶微風至則搖蕩如飛婦人採之以為首飾曰不帶金莖花不得到仙家滄洲人研花如泥竹簡彩繪與真金無異

白菱花

增學圃雜疏白菱花純白而雅且開久而繁人云來自閩中予在閩問之乃無此種始在豫章得之定是嶺南

花也花至季冬始盡性亦畏寒花後宜藏室中

百日紅

與紫薇名同物異

增學圃餘臬梧桐者吳地野生花色淡無植之者淮  
揚間成大樹花微者縉紳家植之中庭或云後庭花也  
獨閩中此花紅鮮異常能開百日名百日紅花作長鬚  
亦與吳地不同園林中植之灼灼出矮牆上至生深澗  
中與清泉白石相映斐然奪目永嘉人謂之丁香花

閩山丹

與草本山丹名同物異



增學圃餘疏初見閩人來賣一花云是紅繡球倭國中  
來者後至建寧見縉紳家庭中花簇紅球儼如翦綵名  
曰山丹乃閩卉也

集藻七言律詩增宋劉克莊山丹偶然避雨過民舍一  
本山丹恰盛開種久樹身樛似蓋澆頻花面大如杯怪  
疑朱草非時出驚問紅雲甚處來可惜書生無事力千  
金移入畫欄栽

七言絕句增宋陳傅良山丹軒窗一日粲三英畫室無

塵眼倍明閩粵固嘗矜絕美風騷猶未及知名 鄭域  
山丹團藥絳蕊發枝間鉛鼎成丹七返還乞與幽人伴  
幽壑不妨相對兩朱顏 無名氏山丹亭下佳人錦繡  
衣滿身纓絡綴明璣晚來銷歇無尋處花已飄零露已  
晞 烟紅露綠曉風香燕舞鶯啼春日長誰道使君貧  
月老繡屏錦帳咽笙簧 人間花木眼曾經未識斯花  
狀與名丹却青山暮春色續他紅樹墜時英

金鉢盂

增草花譜金鉢盂似娑羅而花小夾瓣如甌紅鮮可愛  
集藻七言絕句增宋楊巽齋金鉢盂花恰匝枝頭簇絳  
英朱髥梵器上天成檻邊更插蠻薑葉依約如歸佛手  
擎

繅絲花

增草花譜繅絲花葉儼如玫瑰而色淺紫無香枝生刺  
針時至煮繭花盡開放故名種從根分

笑靨花

增草花譜笑靨花花細如豆一條千花望之若堆雪然  
無子可種根窠叢生茂者數十條以原根劈作數墩分  
種易活

紫羅襪

增草花譜紫羅襪草本色紫翠如鹿葱花秋深分本栽  
種四月發花可愛

紫花兒

增草花譜紫花兒遍地叢生花亦可愛柔枝嫩葉摘可

作蔬春時子種

紅麥花

增草花譜紅麥花麥種花妙如翦子大於麥數倍色紅可愛

米篩花

增葯圃同春碎米雪俗名米篩花

蕾蔭花

增葯圃同春蕾蔭有紅黃白三色開於春月最可扳籬

當植於徑

悶頭花

增東還記程渡灞水至黃澣鋪陌上徧生紫花自根至  
顛純花少葉色如江南諸葛菜桔梗花數百里內皆有  
之楚人呼為悶頭花近之輒頭悶不止相戒以為不可  
嚮邇吳人呼為老鼠花花榦皆入藥春月採而藏之

蝎子花

增東還記程黔省山谷中多蝎子花

龍女花

增雲南志龍女花出大理府太和感通寺樹葉全似山茶藥大而香

和山花

增雲南志和山花樹高六七丈其質似桂其花白每朵十二瓣應十二月遇閏輒多一瓣俗以為仙人遺種在大理府上關和山之麓土人因以其地名之

雲南娑羅花

與四川娑羅花名同物異

增雲南志娑羅花在會城土主廟其本類大理府和山  
花佛日盛開其色白微帶黃意異香芳馥非同凡花臭  
味中出一藥如稗穗垂出瓣中每朵十二瓣遇閏輒多  
一瓣相傳高僧以二念珠入土一珠出此樹云

### 優曇花

增雲南志優曇花在安寧州西北十里曹溪寺右狀如  
蓮有十二瓣閏月則多一瓣色白氣香種來西域亦娑  
羅花類也後因兵燹伐去遂無其種今忽一枝從根旁



發出已及拱矣

金梅

增大理府志金梅所在叢生花似梅色黃與素馨相類

金縷梅

增黃山志金縷梅其色金瓣如縷翩翩嬋娜有若翔舞  
春時盛開望去疑為蠟梅

撚蠟

增黃山志撚蠟似梅而黃一苞具四五朵大者淺碧小

者微黃三月開

春桂

增黃山志春桂經冬不凋枝葉皆似桂惟花五出開以三月與桂不同

旌節花

與黎州圖經旌節花名同物異

增黃山志旌節花色黃榦似老藤一枝綴數十朵成串下垂行行如旌節故名

瓔珞花

增黃山志瓔珞花非黃非碧幽蒨澹冶光豔離合不定  
其形垂垂如柳絲其香澹泊而雋永

紫雲花

增黃山志紫雲花葉尖長花五出深紫色如雲承日光  
故名紫雲

黃桃

增黃山志黃桃枝葉花色與桃無異但趺先實耳

海蜀花

增黃山志海罽花枝杪叢生十餘朶其瓣如苞中抽綠  
心徧覆石崖上花不一色淺深相錯如繡黃山故稱雲  
海至鋪海時花光相映爛若雲錦故有海罽之名

蕊珠花

增黃山志蕊珠花木末開花一朶五出又有細蕊瑣綴  
其下素豔多姿畧有微香

玉鈴花

增黃山志玉鈴花高大龍葱五月開白花一枝十數朶

排列下垂形如玉鈴有同追琢香氣馥烈異常

瑣瑣花

增黃山志瑣瑣花矮樹葉尖有極五月枝杪開細花成叢其香極幽

仙都花

增黃山志仙都花產仙都峰下古幹屈曲枝盡處始布葉葉長二寸許花出葉上一苞七八朵花七出而瓣不分色淡紫心抽綠絲數莖花謝即復孕三年一開開則

葉下垂如相讓然

四照花

增黃山志四照花樹高大而葉沈碧盛夏作花四出而  
銳其末玉色微酣碧蕊綠跗浮葉上光彩照耀巖谷故  
名四照

覆杯花

增黃山志覆杯花空中垂下狀如鏤竹絲朱視之宛然  
一覆杯也

查葡萄花

增黃山志查葡萄花木有芒刺開小黃花如丁香結實紅如丹砂

紫鐸花

增黃山志紫鐸花黃山有之花如懸鐸色紫秋日秀出蔓草中

傲雲花

增黃山志傲雲花高榦參天花如菡萏三夏盛開涉秋

仍馥實如蓮的葉亦饒香

山釵花

增黃山志山釵花形似釵一名碧股花取香山釵莖抽  
碧股之句開在夏中樹最小而多致

絳穎花

增黃山志絳穎花樹高葉尖盛夏開小紫花成叢山中  
謂之錦球

蠟瓣花



增黃山志蠟瓣花葉大於掌花五出長二寸許枝枝下垂深黃滑澤如琢蜜蠟而成

疊雪花

增黃山志疊雪花一名鶴翎花綴枝頭霏霏如雪中含一壺蘆高出花外瑩然如刻玉

囊環花

增黃山志囊環草花也大葉紫莖花形如玉環一雙韜紫綺囊中

美人菊

增黃山志美人菊花似菊單瓣有紫白二色葉似虞美人柔曼旖旎最為可愛

醉春花

增黃山志醉春花瘦梗碧葉繁花繽紛類秋海棠而柔縷多姿態產黃山

鷺羣花

增黃山志鷺羣花藤屬葉尖有極花形類鷺清秋開時

若羣鷺游於碧波間也

海瓊花

增黃山志海瓊花產於天海枝盡處大葉生焉花莖三五出葉中未開時垂朶如罌正開則如雕紫玉浮光豔與海雲相映

寶網花

增黃山志寶網花細白絲縈繞之冬日貯瓶中不水而長豔

紫霞杯

增黃山志紫霞杯狀如杯色紫無葉止一綠苞如瓢以承之

黃花

增黃花不知其名一朶四瓣合抱如金盞其色鵝黃出汗帖木兒嶺以北每一莖只一朶翩然獨秀衆草經霜凋萎是花經霜顏色愈覺鮮明

馬蹄蘭

增馬蹄蘭生平地亂草間葉劍樣如建蘭堅韌不可斷其花翠色可愛秋則結苞成子塞外尤多

地樁花

增地樁花青紫色花瓣如葵一花八九瓣徑二寸許瓣落盡則花心結子成堆取之可以為漿

鸞枝

增鸞枝花木本枝幹俱似桃葉有刻缺似棣棠三月附枝開花或著樹身最繁茂瓣多而圓似郁李而大深紅

色京師多有之

長樂花

集藻賦增晉傳玄紫華賦并序紫華一名長樂生於蜀  
其東界特饒中國奇而種之余嘉其華純耐久可歷冬  
而服故與友生各為之賦有遐方之奇草稟二氣之純  
精仰紫微之景曜因令色以定名剛莖勁立纖條繁列  
從回風以搖動紛蘭暢而蕙潔蔚青葱以增茂竝含華  
而未發於是散綠葉秀紫榮蘊若芝草之始敷灼若百

枝之在庭獨參差以照曜何光麗之雜形渙渙昱昱而  
奪人目精下無物以借喻上取象於朝霞妙萬物而比  
艷莫茲草之可嘉 唐蘇頲長樂花賦并序蜀太守庭  
際有紫華草秋早始繁英露洗冬早尚直本霜封蕪雜  
大同於衆卉盛衰小異於羣物予訝而未識吏或告余  
曰此長虞所賦蜀長樂花也故心賞焉因口授書吏遂  
墨而成作恨不見古人所為得髣髴其旨爾夫長者以  
短長之形度其長則至美夫樂者以哀樂之類同其樂

則至喜長也樂也吾安得而閒之嘉纖植之竝用偉令  
名兮在茲徒見其豐族莽蓴高標璀璨莖丹外而縞中  
葉縹分以紅貫綴綠穎之重疊索紫蕤之爛熳迫而象  
之君子其常或微或章聳危冠兮櫻若綬默退靜其何  
望遠以意之佳人欲翔炫炫煌煌重羅綺兮撲瑤翠蹇  
來思而未嘗匪以幽兮自直匪以直兮自藏匪以晚兮  
自耀匪以耀兮自強文濁露之均灑庇清舒之泛光本  
無嫌於散地甘有寓於殊方然則太液初滿上林新霽



芊茸灼爍萬品千計搖瑞色而涵芝雜奇葩而轉蕙孰  
與夫玉堂金閣之偏賞白日青春之特麗歲不與兮時  
向闌風蕭蕭兮夜漫漫賓遠鴻於沙塞叫離鶴於江干  
君曾不見三月華矣盡林間之槁木千霜殞矣亦庭下  
之枯蘭懿此常度凌於早寒假春期而不彩雖秋令而  
不殘衝雨霰之飛薄任雲山之險難芳弗珍於霍靡節  
恒慕於檀藥吾則知樹背之奚托傾心之可安如後凋  
之可貴罔獨立其誰觀文學掾起而為亂曰白露瀼瀼

何草不黃紫華灼灼生君之堂彼不伐兮秋自翳時或  
珍兮君是惠彤庭赫兮朱草駢交屈軼兮友賓連伊榛  
莽而荒此君曷為而賦旃

優鉢羅花

集藻歌增唐岑參優鉢羅花歌并序參嘗讀佛經聞有  
優鉢羅花目所未見天寶庚申歲參忝大理評事攝監  
察御史領伊西北庭度支副使自公多暇乃於府庭內  
栽樹種藥為山鑿池婆娑乎其間足以寄傲交河小吏

有獻此花者云得之於天山之南其狀異於衆草勢寵  
從如冠弁巍然上聳生不旁引攢花中折駢葉外包異  
香騰風秀色媚景因賞而嘆曰爾不生於中土僻在遐  
裔使牡丹價重芙蓉譽高惜哉夫天地無私陰陽無偏  
各遂其生自物厥性豈以偏地而不生乎豈以無人而  
不芳乎適此花不遭小吏終委諸山谷亦何異懷才之  
士未會明主擯於林藪耶因感而為歌歌曰白山南赤  
山北其間有花人不識綠莖碧葉好顏色葉六瓣花九

房夜掩朝開多異香何不生彼中國兮生西方移根在  
庭媚我公堂恥與衆艸之為伍何亭亭而獨芳何不為  
人之所賞兮深山窮谷委嚴霜吾竊悲陽關道路長曾  
不得獻於君王

戎王子

集藻五言律詩增唐杜甫游何將軍山林萬里戎王子  
何年別月支異花開絕域滋蔓匝清池漢使徒空到神  
農竟不知露翻兼雨打開拆日離披

冬瑰花

集藻五言排律詩增唐盧綸和李舍人昆季詠冬瑰花寄  
贈徐侍郎獨鶴寄烟霜雙鸞思晚芳舊陰依謝宅新艷  
出蕭牆蝶散搖輕露鶯銜入夕陽雨朝勝濯錦風夜劇  
焚香斷日千層艷孤霞一片光密來驚葉少動處覺枝  
長布影期高賞留春為遠方嘗聞贈瓊玖叨和愧升堂  
司空曙和李員外與舍人詠冬瑰花寄徐侍郎仙吏  
紫薇郎奇花共翫芳攢星排綠蒂照眼發紅光暗妒翻

堦葉遙連直曙香  
遊枝蜂繞易礙刺  
鳥銜妨露濕凝衣  
粉風吹散藥黃蒙  
籠珠樹合煥爛錦  
屏張留客勝看竹  
思人比愛棠如傳  
採蘋詠遠思滿瀟  
湘

海紅

集藻五言律詩增唐劉長卿夏中崔中丞宅見海紅搖  
落一花獨開何事一花殘閒庭百艸闌綠滋經雨發紅  
艷隔林看竟日餘香在過時獨秀難共憐芳意晚秋露  
未須漙

燕蓊花

集藻七言絕句增唐李郢燕蓊花十二街中何限草燕  
蓊盡欲占殘春黃花撲地無窮極愁殺江南去佳人

玉燭花

集藻七言律詩增唐劉兼玉燭花裊裊香英三四枝亭  
亭紅艷照堦墀正當晚檻初開處却似春闌就試時少  
女不吹方燭燭東君偏惜未離披夜深斜倚朱欄外擬  
把鄰光借與誰

杏香花

集藻五言絕句增宋邵雍杏香花客說何州事經營香  
味佳訝予獨無語貪嗅杏香花

萬蝶花

集藻七言絕句增宋蘇轍萬蝶花誰唱殘春蝶戀花一  
團粉翅壓枝斜美人欲向釵頭插又恐驚飛鬢裏鴉  
楊巽齋萬蝶花粉翼紛紛簇幾叢搖風欲趁賣花翁詩  
眸覽倦方歌枕栩栩猶疑在夢中



真珠花

集藻七言絕句增宋張舜民真珠花風中的顰月中看  
解作人間五月寒一似漢宮梳洗了玉瓏葱壓翠雲冠  
千璣萬琲照庭除細雨斜風拂座隅莫道長安貧似  
磬緣堦遶砌盡真珠楊巽齋咏真珠花累累花發映  
庭除柳帶榆錢總不如一任春風吹滿地幽人步履自  
虛徐

鷹爪花

集藻五言絕句增宋王十朋鷹爪花誰把名鷹爪天然  
狀不殊無心事搏擊中有為相好

閣提花

集藻七言絕句增宋鄭域閣提花此花移種自招提借  
佛為名識者希優鉢曼陀果何似并參香色問因依

御帶花

集藻七言絕句增宋翁元廣御帶花未放枝頭嫩葉青  
先開絳蕊照春晴若無顏色宜宮院安得花間御帶名

玉手爐花

集藻七言絕句增宋翁元廣玉手爐花小院無人春意  
深凌風傲日出牆陰只因落在山僧手那得王孫為賞  
音 無名氏玉手爐花習習東風二月餘此花宜近玉  
庭除美人雲鬢不宜插獻與觀音作手爐

小黃渠花

集藻五言絕句增宋劉允叔小黃渠花簌簌碎金英絲  
絲縷玉莖步搖釵朶見老眼為增明 山礬紛似玉黃

藥碎如金二美傳春晚同心契爾音

繭漆花

集藻七言絕句增宋劉允叔繭漆花清晨步上金雞嶺  
極目漫山繭漆花雪蕊瓊絲亦堪賞樵童蠶婦帶歸家

滿堂春

集藻七言絕句增宋楊巽齋滿堂春花發園林畫錦如  
列仙行綴在蓬壺千金須撇豪家賞一笑春風無向隅

御仙花

集藻七言絕句增宋楊巽齋御仙花不逐凡花逞艷嬌  
移根上苑獨清高君王曾選裝金帶侈錫持荷耀紫袍  
壽春花

集藻七言絕句增宋楊巽齋壽春花花開綴玉碧敷腴  
香挹南薰景又殊天賦芳姿長不老命名為壽定非誣  
散水花

集藻七言絕句增宋無名氏散水花盈枝點綴雪花鮮  
環映清流分外妍應是東君歸騎速不知墜下玉絲鞭

孩兒花

集藻七言絕句增宋無名氏孩兒花纖穠初見似嬌癡  
鼓舞春風二月時何事自開還自落可憐造化亦兒嬉

練春紅

集藻七言古詩增元稹謝王參議送練春紅二枝玉  
堂老仙玩幽獨閉戶無人似初溲倚欄岸幘領孤芳  
藪輕紅冠羣綠化工有意卑凡卉積李崇桃空眩目  
爭先闕巧等堪憐已向東風盡驅逐此花精妍淨如洗收

拾餘春傲榮辱何郎湯餅徒試妝太真溫泉空賜浴天  
然生色鑄真態亭午低頭睡初足誰言花后最奇絕我  
怪酪奴能汙觸嫣然一笑奉清歡莫把金尊歌別鵠并  
刀妙剪駢頭來珠露淋漓袖新感似嫌凡子多京塵却  
恨高人付流俗微風澹蕩新雨生強拭愁容吐殘馥擬  
將色筆寫清意綺語非工那忍瀆裴回中庭月過半翠  
袖凌風注寒玉

長十八

集藻七言絕句增元納新塞上曲雙鬟小女玉娟娟自  
卷羶簾出帳前忽見一枝長十八折來簪在帽簷邊

波羅花

集藻詞增宋毛滂清平樂雲峰秀疊露冷琉璃葉北畔  
波羅花弄雪香度小橋淡月與君踏月尋花玉人雙  
捧流霞吸盡杯中花月竹風相送還家

疊羅花

集藻詞增金党懷英感皇恩碧玉撚條藍袍裁葉明艷



黃深軟金疊道裝仙子謫墮蕊珠宮為春閒管領花時  
節 漢額妝濃楚腰舞怯襞積裙餘舊宮褶東君著意  
留伴小庭風月任教鷓鴣喚羣芳歇

藍雀花

增藍雀花其花如雀有身有翼有尾有黃心如兩目或  
云即茱萸花

集藻五言絕句

御製山菊藍雀花雨過初涼至山花滿野馨雖無紅紫艷能

使屬車停

翠蛾眉


增翠蛾眉花翠色隨日側映鮮妍有致

御定佩文齋廣羣芳譜卷五十三

謹案第三十一頁後六行嘗聞贈瓊玖刊本嘗訛  
當今改

第三十六頁前六行倚欄岸幘領孤芳刊本領訛  
倚據元詩本改





總校官庶吉士

臣侍

朝

校對官編修

臣裴

謙

謄錄監生

臣劉

昀